

DOMINGU XIV TEMPU KOMÚN – TINAN C

Tema

Tema ne'ebé domina iha leitura sira ohin nian mak “enviu”: iha figura eskolante 72 Evanjellu nian, iha figura profeta anónimu nian ne'ebé ko'alia ba makhorik sira Jerusalém nian kona-ba Maromak ida ne'ebé hadomi sira, eh iha figura apóstolu Paulo nian ne'ebé haklaken glória krús nian, ita hetan konvite atu foti konxiénsia katak Maromak haruka ita atu fó sasin ninia Reinu.

Liuliu iha *Evanjellu*, tema “enviu” nian hatudu klaru liután. Jezús nia eskolante sira hetan mandatu atu bá mundu hodi kontinua obra libertadora ne'ebé Jezús hahú no propoin Liafuan Di'ak Reinu nian ba ema sira rai tomak nian, laho esesaun; sira tenke halo ne'e ho urjénsia, simplisidade no domin. Iha eskolante sira nia asaun, Reinu manán buat hotu ne'ebé hanehan no halo ema sai atan.

Leitura dahuluk, apresenta profeta anónimu ida nia liafuan, ne'ebé simu enviu atu haklaken Maromak nia domin, domin ida nu'udar aman no inan ida ba nia povu. Profeta mak ida-ne'ebé Maromak haruka atu konsola ema sira, liberta sira husi ta'uk no hatudu esperansa kona-ba mundu foun ne'ebé atu mai.

Iha *leitura daruak*, apóstolu Paulo husik mai ita dalan ne'ebé nia tenke halo: la'ós interese foti-an no glória nian mak dudu nian, maibé sasin krús nian de'it – katak, sasin kona-ba Jezús, ne'ebé hadomi ho modu radikál to'o halo nia moris sai don ida ba ema hotu. Maski iha sofrimentu, apóstolu tenke fó sasin, ho moris rasik, domin radikál; husi ne'e mak hahú moris foun Ema Foun nian.

LEITURA I – Is 66,10-14c

Kapítulu 56-66 Livru Isaías nian (hanaran “Trito-Isaías”) tuir estudiozu sira, soi autór lahanesan, ne'ebé iha ligasaun espirituál ho Deutero-Isaías (autór kapítulu 40-55 Livru Isaías nian). Ita la hatene buat ida kona-ba sira anaunserke sira apresenta sira-nia mensajen iha tinan ikus sira sékulu VI nian no iha tinan dahuluk sira sékulu V mK.

Ita iha Jerusalém, tinan ruma liutiha ema judeu sira fila fali husi Ezíliu iha Babilónia. Rekonstrusaun neineik liu no iha situasaun susar; maioria populasaun moris iha mamukit/mizéria; inimigu sira kontinua ataka no halo esforsu konstrusaun nian sai susar; esperansa hetan krize... Povu husu: “bainhira mak Maromak sei realiza promessa ne'ebé nia halo iha kedas Babilónia, liuhusi Deutero-Isaías?”

Nune'e mak profeta sira tempu ne'ebá nian buka apresenta mensajen salvasaun nian no habiit esperansa, atu Povu manán fali forsa no konfia iha Maromak. Iha kontestu ida-ne'e mak ita bele tau knananuk ne'ebé leitura dahuluk propoin mai ita: profeta apresenta kuadru ida restaurasaun sidade nian (kf. Is 66,7-14) no bolu nia makhorik sira ba ksolok.

MENSAJEN

Iha kuadru restaurasaun nian ne'e, profeta nia objetivu fundamentál mak “konsola” Povu martirizadu, iha terus laran, iha laran-susar, ne'ebé la haree perspetiva futuru nian no lakon esperansa. Oinsá profeta sei “haktuir” mensajen ne'ebé Maromak konfia?

Kuadru tomak apresenta Jerusalém nu'udar inan. Tur ahi tiha nia oan (povu), laho esforsu no molok tempu (kf. Is 66,7), inan /Jerusalém habosu nia oan ho susu-been naresin ne'ebé fó

kbiit (kf. Is 66,11). Espresaun sira uza iha-ne'e (referénsia ba "susu susu-been to'o bosu", iha inan nia "susun glória nian") fó hanoín, ilas fekundidade nian, rikusoin nian, moris nakonu nian. Buat hotu fasil, lais, naresin, nakonu.... Profeta hatene katak Maromak mak haraik moris no fekundidade ne'e hotu ne'ebé inan/sidade fó ba nia oan/povu.

Iha "tradusaun" ilas nian, profeta haktuir katak Maromak mak haraik ba sidade/inan dame no nasaun sira nia rikusoin (atu nia fahe fali ba nia oan/povu). Dame ("shalom") iha-ne'e la'ós de'it iha funu: inklui saúde, fekundidade, prosperidade, amizade ho Deus no ho ema seluk; sinónimu ho ksolok totál. Ida-ne'e mak Maromak hakarak ba nia Povu no Nia hakarak haraik to'o naresin.

Profeta ko'alia kona-ba Maromak nu'udar Aman ida ne'ebé fó ba nia oan/povu moris naresin no nakonu, hamaus no konsola nia hanesan inan ida. Profeta propoin ba nia Povu Maromak ida ne'ebé hadomi no, loroloron, bá hasoru ema sira atu lori salvasaun. Tan ne'e mak nia konvida nafatin sira atu haksolok.

LEITURA II – Gal 6,14-18

Ohin ita remata leitura Surat ba Gálata sira. Domingu sira liubá, ita dehan tiha ona katak kestaun fundamentál iha surat ne'e mak enfrenta ezijénsia husi judeu sira atu kumpre Lei Moisés nian. Paulo konsidera katak Kristu de'it mak importante no buat seluk mak lei no ritu ne'ebé la presiza eh, piór liután, hamosu de'it moris atan nian.

Testu ne'e hola parte ba konklusaun surat nian (kf. Gal 6,11-18). Iha-ne'e Paulo halo rezumu ida ba ninia argumentasaun anteriór kona-ba Kristu, Lei no salvasaun.

MENSAJEN

Paulo hahú hodi fó sai sá loos interese sira ne'ebé dudu "judaízante sira" ne'ebé haklaken sirkunsizaun: sira-nia finalidade mak evita persegisaun (hodi halo kristianizmu ramu ida judaizmu nian, nune'e sai relijiaun ida ne'ebé iha autorizasaun husi impériu); aleinde ne'e, sira mak ema ne'ebé hakarak hatudu an, tanba hodi konsege impoin sirkunsizaun ba ema seluk sira hatudu susesu iha proselitizmu (konsege koverte ema jentiu ba fiar judaika)...

Buat ne'e la iha importánsia ida ba Paulo. Títulu glória nian mesak ne'ebé importante ba apóstolu ne'e mak Na'i Jezús Kristu nia krús. Ko'alia kona-ba "Jezús Kristu nia krús" mak ko'alia kona-ba don totál moris nian, saran an rasik tanba domin. Ne'e mak objetivu Paulo nia pregasaun nian, tanba liuhusi mate ba egoizmu no moris ba domin mak hamosu "Ema Foun", Isarel Maromak nian", Maromak nia Povu.

Ne'e mak tema foun Paul inaugura: tema Ema Foun iha Kristu Jezús (vers. 15). Iha perspetiva paulina, sarani nia identifikasaun ho Kristu nia krús – katak ho domin totál Kristu nian – mak hamosu Ema Foun, livre husi egoizmu no preokupasaun ba an rasik, ho kapasidade atu hadomi hodi la sukat. Ema Foun ne'e, ilas Jezús Kristu nian, sei iha kbiit atu supera salan no mate no to'o iha moris nakonu, ksolok totál.

Paulo rasik luta atu to'o ba objetivu ne'e. Nia lori iha nia isin marka sira Jezús nian (kf. vers. 17). Indikasaun ne'e la refere ba "estigma sira", maibé ba fitar sira husi kanek ne'ebé Paulo simu tanba hala'o ninia apostoladu. Iha sociedade greku-romana, ema atan ida-idak lori marka ida, nu'udar sinál pertense ba patraun ida; nune'e, marka sira nia terus nian tanba Evanjellu hatudu katak Paulo pertense ba Kristu: husi marka sira, Paulo hatudu nia hakaran atu hadomi, fó moris nian no ninia hola-parte ba Kristu ne'ebé hadomi to'o mate iha krús. Surat ida-ne'e mak ida mesak ne'ebé liafuan "maun-alin sira" mosu iha saudasaun ikus (vers. 18): ne'e mak hakilar ida laran-susar no konfiánsa nian, ne'ebé husu atu iha komuñau no hatudu esperansa atu bele harii fali fraternidade.

EVANJELLU – Lc 10,1-12.17-20

Evanjellu tau ita dala ida tan iha kontestu Jezús nia dalan ba Jerusalém. Nia apresenta mai ita etapa ida tan ba “dalan espirituál” ne’e, iha-ne’ebé Jezús oferese ba nia eskolante sira plenitude revelasaun Aman nian no prepara sira atu kontinua, bainhira nia bá ona, misaun atu lori Evanjellu ba ema hotu.

Istória kona-ba haruka eskolante 72 mak tradisaun ida Lucas nian mesak. Se ita haree ida-ne’e nu’udar relatu fotográfiku ida akontesimentu konkretu nian, ita sei husu: husi ne’ebé mak mosu ema na’in 72 ne’e, ne’ebé Mateus no Marcos la temi liu? Konserteza ida-ne’e mak katekeze ida, iha-ne’ebé Lucas propoin ba eskolante sira tempu hotu nian, reflesaun ida kona-ba Kreda nia misaun, iha ninia dalan iha mundu ne’e.

MENSAJEN

Iha katekeze ida-ne’e, Lucas hanorin katak ema sarani tenke kontinua iha mundu Jezús nia misaun, hodi sai testemuña, ba ema hotu, kona-ba proposta salvasaun/libertasaun ne’ebé Kristu lori mai.

Testu hahú hodi apresenta número eskolante sira ne’ebé Na’i haruka: 72 (vers. 1). Ne’e mak, evidentemente, número simbóliku ida, ne’ebé tenke tau iha relasaun ho Gn 10 (iha versaun grega Antigu Testamentu nian), iha-ne’ebé número ne’e refere ba totalidade nasaun ne’ebé la’ós judeu/jentiu horik iha rai. Nune’e, nia signifika, katak Jezús nia proposta mak proposta universál ida, destina ba povu hotu, husi rasa hotu.

Hafoin, Lucas hateten katak Na’i haruka sira bá na’in rua-rua. Hao nune’e atu aseguira katak sira-nia testemuña iha valór jurídiku (kf. Dt 17,6; 19,15); no hakarak sujere katak anúnsiu Evanjellu nian mak knaar komunitáriu ida, ne’ebé la halo tanba inisiativa pesoál no ema ida-nian, maibé iha komuñau ho maun-alin sira.

Lucas hatudu mós katak, eskolante sira simu enviu atu bá iha aldeia no lokalidade sira ne’ebé Jezús “atu bá”. Ho forma ida-ne’e, nia hatudu katak eskolante sira-nia knaar la’ós atu haklaken mensajen rasik, maibé prepara Jezús nia dalan no fó testemuña kona-ba Nia. Hotu tiha apresentasaun inisiál ne’e, Lucas deskreve oinsá konkretiza misaun ida-ne’e. Iha fatin dahuluk, avizu ida kona-ba difikuldade misaun nian: eskolante sira bá hanesan “bibimalee sira iha asu-fuik nia leet” (vers. 3). Ilas ne’e, iha Testamentu Tuan, haktuir ema justu nia situasaun, mesak iha ema jentiu sira nia leet (kf. Ben Sira 13,17; iha versaun ruma, ilas ida-ne’e mosu iha 13,21). Iha-ne’e, nia espresa eskolante fiél nia situasaun, hasoru mundu nia inimizade.

Iha fatin daruak, ezijénsia ida pobreza no simplisidade nian ba eskolante sira iha misaun: eskolante sira le bele lori ho sira kohe, sandália; la bele para atu kumprimenta ema iha dalan (vers. 4); la bele mós haksoit husi uma ida ba uma seluk (vers. 7). Indikasaun atu la lori buat ida iha dalan sujere katak Evanjellu nia kbiit la’ós iha meu materiál sira, maibé iha Liafuan libertadór nia kbiit; indikasaun atu keta kumprimenta ema ida tuir dalan hatudu urjénsia misaun nian (atu la adia anúnsiu nia Reinu, basá iha kultura orientál baibain presiza kontinua nafatin kumprimenta ema hotu); indikasaun atu keta haksoit husi uma ida ba uma seluk sujere katak preokupasaun fundamentál eskolante sira-nian mak dedikasaun totál ba misaun no la buka ospitalidade ida konfortavel liu.

Sá loos mak anúnsiu fundamenál ne’ebé eskolante sira apresenta? Sira tenke hahú hodi haklaken “dame/hakmatek” (vers 5-6). Ida-ne’e la’ós de;it saudasaun normál entre judeu sira, maibé anúnsiu dame mesiánika ne’ebé prezide Reinu. Anúnsiu ida kona-ba mundu foun fraternidade nian, armonia ho Maromak no ho ema seluk, moris di’ak nian, ksolok nian

(“shalom”). Anúnsiu ne’e tenke komplementa ho jestu sira libertasaun nian, ne’ebé hatudu Reinu nia prezensa iha ema sira nia leet (vers. 9).

Liafuan ameasa nian ba sidade sira ne’ebé lakohi simu mensajen (vers. 10-11) ita la bele lee ho modu literál: ne’e mak forma orientál atu hateten katak rejeita Reinu sei lori konsekuénsia aat liu ba sira ne’ebé hili atu kontinua moris iha dalan egoíizmu nian, foti-an nian no autosufisiénsia nian.

Iha vers. 17-20, Lucas refere rezultadu asaun misionária eskolante sira-nian. Liafuan sira Jezús uza atu simu eskolante sira deskreve, ho modu figurativu, Reinu nia prezensa nu’udar realidade libertadora (samea no sakunar sira mak símbolu kbiit sira aat nian ne’ebé halo ema sai atan; “Satanás ne’ebé monu namtate” signifika katak buat aat nia reinu hahú naksobu, iha konfrontu ho Maromak nia Reinu).

Maski hetan susesu iha misaun, Jezús bolu eskolante sira-nia atensaun hodi fó avizu atu keta foti-an ho obra ne’ebé sira hala’o, maibé haksolok tanba sira-nia naran “hakerek iha lalehan” (ilas livru ida iha ne’ebé ema di’ak sira-nia naran hakerek bá bele hetan beibeik iha tempu ne’e, liuliu iha apokalipse – kf. Dn 12,1; Ap 3,5; 13,8; 17,8; 20,12.15; 21,27).